

**ODABRANI HADISI  
ČASNOG POSLANIKA ISLAMA s.a.v.s.**

## **Povodom proslavljanja stogodišnjice svjetski raširene Ahmadija zajednice**

Ovo je dar onih ahmadi muslimana koji su, čak i u ovom vremenu proganjani i ubijani samo zbog ljubavi prema *Kelimei šhadetu*. Oni podnose sve ove muke u duhu Bilala.\*

*\* Bilal (da Allah bude zadovoljan s njim) bio je jedan od drugova (ashaba) Časnog Poslanika s.a.v.s. Premda je bio podvrgnut najgorim oblicima mučenja zbog prihvatanja islama, on je bio spreman radije umrijeti nego odreći se svog vjerovanja u Božije Jedinstvo.*

## PREDGOVOR

Islam je uzvišena religija. Temelj njegove veličine je u tome što je Časni Kur'an čist od grešaka i što su njegova učenja potpuna i savršena, i u činjenici da je Osnivač islama, Časni poslanik Muhammed s.a.v.s., prakticirao ova učenja u najvećoj mjeri. On je tako postao savršeni i živi primjer onoga što je podučavao.

Duboka i neraskidiva veza između njegove prakse i učenja ostavili su neizbrisiv dojam na njegove drugove. Poslije njegove smrti, kad je njegova žena Ajša bila upitana o životu Časnog poslanika Muhammeda s.a.v.s., njen odgovor je bio:

*'Njegov život je bio Kur'an.'*

Nije bilo nikakvog proturječja između njegove riječi i Božije objave. Njegova objava je bila čista, bez i najmanjeg utjecaja njegovih vlastitih želja. Časni Kur'an svjedoči ovo o njemu:

*'On ne govori po svojoj želji. To je samo objava koja (mu) se objavljuje'*

Nije čudno onda da je on u Časnom Kur'anu predstavljen kao izvrstan uzor za cijelo čovječanstvo i za sva vremena koja dolaze. Svemogućí Bog kaže u Časnom Kur'anu:

*'Za vas je tamo lijep primjer u Božijem Poslaniku.'*

Odabir ajeta Časnog Kur'ana koji se odnose na neke važne oblasti čovjekovog interesovanja već je bilo objavljeno. Ovdje je predstavljen kratki izbor *hadisa*, to jest predanja u pogledu života, postupaka i izreka Časnog Poslanika s.a.v.s. Proučavanje ovih izreka omogućava kratko predstavljanje svakodnevnog života Časnog Poslanika s.a.v.s. kao i njegovih molitvi, visokih moralnih standarda i stila (načina) propovijedanja.

Iako je za neka predanja izneseno da su bila napisana u toku života Časnog Poslanika s.a.v.s., većina ih je bilo zapisano nekih 200 godina poslije njegove smrti. Uprkos činjenici da je većina hadisa bila skupljena poslije tako dugog perioda, oni se i dalje mogu smatrati vrlo pouzdanim u svjetlu slijedećeg:

Pošto su riječi Časnog Poslanika s.a.v.s. bile veoma poštovane, sve ono što je on rekao bilo je odmah zapamćeno i zatim ponovljeno, saopćeno i o tome se međusobno govorilo nebrojeno puta.

Drugi važan razlog je što su njegove riječi bile tretirane sa velikom vjerskom naklonošću i posvećenošću. Bilo kakvo umetanje ili čak najmanje odstupanje od njegovih originalnih riječi bilo je smatrano grijehom za koji je osoba bila odgovorna Bogu. Upozorenje Časnog Poslanika s.a.v.s. lično bilo je:

*'Džehennem će biti boravište osobe koja meni pripisuje ono što ja nisam rekao.'*

Treće, kad su ljudi ispričali stvari o njemu ili od njega prenosili drugima, bio je običaj za primaoca takve poruke ne samo da zapamti šta mu je rečeno nego također da zapamti ime i detalje o osobi koja mu je to prenijela, tako da ako njegova riječ bude ispitivana, on je mogao navesti izvor.

Četvrti važan razlog je što su Arapi bili popularni zbog svog izvrsnog pamćenja. Čak i prije dolaska Časnog Poslanika s.a.v.s. nije rijetko bilo naći među njima ljude koji su pamtili 100,000 stihova arapskih pjesnika ili čak više. Uz ovo, bio je popularan običaj pamtiti porodična stabla. Poslije dolaska Časnog Poslanika s.a.v.s. duhovni standard njegovih sljedbenika je bio podignut do vrlo visokog stepena i navika uvećavanja bila je pogotovo osuđivana. Osim toga, u Časnom Kur'anu pridaje se važnost ne samo istini nego i provjeri izjava.

Kao rezultat ovih razloga, predanjima Časnog Poslanika s.a.v.s. pridavao se poseban značaj, nepoznat drugim sistemima zbirki historijskog materijala.

U procesu skupljanja ovih hadisa muslimanski učenjaci radili su tako precizno i toliko je pažnje bilo posvećeno tačnosti da se ni jedna zbirka bilo kojih drugih historijskih podataka ne može usporediti sa sastavljanjem hadisa Časnog Poslanika islama s.a.v.s. Svaka veza u lancu pripovjedača određenog hadisa specificirana je u glavnim djelima *hadisa*. Čak je i proučavanje karaktera pripovjedača i njihove pouzdanosti postalo posebna tema istraživanja. Kao rezultat toga, nastala je nova forma znanja u pogledu analiza predanja prvi put u ljudskoj historiji.

Za korist onih čitalaca koji vrlo malo znaju o islamu, moramo ovdje spomenuti da je napisano mnogo knjiga hadisa, ali od njih samo šest muslimanski učenjaci smatraju najvažnijim. Oni su poznati kao **Sihah Sittah** (Šest autentičnih knjiga). Većina hadisa predstavljenih u ovoj zbirci uzeti su iz ovih šest knjiga. Slijedi kratko predstavljanje ovih knjiga i učenjaka koji su ih sastavili:

#### **SAHIH BUHARI:**

Ova knjiga se smatra najautentičnijom knjigom poslije Časnog Kur'ana. Njen sastavljač je Muhammed Ismail iz Bukhara, općepoznat kao imam Buhari (rođen 194, umro 256. po Hidžri; ili 816-878 A.D.).

#### **SAHIH MUSLIM:**

Na drugom mjestu po važnosti smatra se **Sahih Muslim**. Ovu knjigu sastavio je Muslim bin Al-Hadždžadž, koji je bio iz Neshapura u Khorosanu (rođen 202, umro 261. po Hidžri; ili 824-883 A.D.).

#### **DŽAMI AL-TIRMIZI:**

Treća po redu je **Džami Al-Tirmizi**. Sastavljač - imam Muhammed Bin Isa bio je iz Tirmiza (rođen 209, umro 279. po Hidžri; ili 831-901 A.D.).

#### **SUNAN ABU - DAUD:**

Slijedeća je **Sunan Abu - Daud**, sastavljena od Sulejmana bin Al-Ashas, poznatog kao Abu - Daud (rođen 202, umro 275. po Hidžri; ili 824-897 A.D.).

#### **SUNAN IBN - MADŽA:**

Na petom mjestu važnosti smatra se **Sunan Ibn - Madža**. Ona je bila sastavljena od Muhammeda bin Madže koji je bio iz popularnog grada Kizvina u Iraku (rođen 209, umro 275. po Hidžri; ili 831-879 A.D.).

**SUNAN NISAI:**

Šesta knjiga je **Nisai**. Ona je bila sastavljena od Ahmada bin Shuaiba, poznatog kao 'Nisai', po gradu Nisa u Khorasanu (rođen 215, umro 306. po Hidžri; ili 837-928 A.D.).

**MUVATTA IMAM MALIK:**

Pored **Sihah Sittah** (šest autentičnih knjiga), tu je još jedna vrlo važna zbirka hadisa poznata kao **Muatta imam Malik**. Sastavljač Malik bin Anas opće je poznat kao imam Malik. Ova knjiga nije uključena među Sihah Sittah pošto se, prije svega, smatra da je knjiga prava, i ova objašnjenja hadisa su većinom navedena u diskusijama pravnih problema. Vjerodostojnost pripovijedanja navedenog u Muvatta imam Malik može biti opravdana činjenicom da su sva uključena u Sahih Buhari i Sahih Muslim. Status imama Malika među sastavljačima hadisa je tako visok da je on poznat kao '*imam Muhaddisin*' (vođa sastavljača), i svi oni svjedoče o njegovom uzvišenom položaju.

## SADRŽAJ

1. Namjera i postupci	7
2. Ljubav Gospodara	9
3. Časni Kur'an	10
4. Uzor za Allahovom Vjerovjesniku	10
5. Temelji islama	11
6. Post	13
7. Hadž	13
8. Zekat (Trošenje na Allahovom putu)	14
9. Naređivanje dobra i zabranjivanje zla	15
10. Pozivanje ljudi Allahu	15
11. Halal i haram	16
12. Brak	16
13. Lijepo ponašanje	17
14. Islamsko društvo	18
15. Biti zahvalan ljudima	19
16. Lijepo postupanje prema roditeljima	19
17. Lijepo postupanje prema susjedima	19
18. Ljubaznost prema slabima	20
19. Oprost	20
20. Ponašanje za jelom	21
21. Odjeća	21
22. Čistoća	21
23. Ljubomora	22
24. Oholost	22
25. Opadanje islama	23
26. Dolazak Imama Mehdija	23
27. Hudba hadžet-ul Vida (Oprosní hadž)	24

## Namjere i postupci

1. Pričao nam je El-Humejdi, a njemu Sufjan, njemu Jahja Ibn-Seid El-Ensari kako ga je Muhammed Ibn-Ibrahim Et-Tejmi obavijestio da je čuo Alkamu Ibn-Vekkasa El-Lejsija kako veli da je čuo s minbera od Omera Ibn El-Hattaba r.a. da je kazao:

- Čuo sam kako je Allahov poslanik, s.a.v.s, rekao:

"Djela se mjere prema namjerama, i svakom čovjeku pripada ono što je namjeravao. Čija hidžra bude radi Allaha i Njegovog Poslanika, njegova hidžra će biti za Allaha i Njegovog Poslanika; a čija hidžra bude traženje dunjaluka ili ženidba ženom, njegova je hidžra za onoga za koga je on činio hidžru."

(Buhari)

2. Prenosi se od hazreti Abdullaha Ibn-Amra Ibn El-Asa r.a., a on prenosi od Vjerovjesnika s.a.v.s.:

- Musliman jeste onaj od čijeg su jezika i ruku muslimani sigurni, a muhadžir je onaj što ostavi ono što je Allah zabranio.

(Buhari)

3. Abdullah ibn Omer pričao je kako je Vjerovjesnik s minbera proučio ajet: "*Nebesa će biti smotana Njegovom desnom rukom, slava Njemu i uzvišen je On iznad onog što Mu oni pridružuju.*"

Božiji Poslanik s.a.v.s. je rekao: "Allah kaže: 'Ja sam Silni, Ja sam Veliki, Ja sam Vladar, Ja sam Uzvišeni, koji govori o Svojoj slavi.'"

I kaže:

- Poslanik je to ponavljao sve dok se minber nije počeo tresti, pa smo pomislili da će pasti s njega.

(Ahmed)

4. Od Ebu-Hurejre r.a. prenosi se da je Poslanik s.a.v.s. kazao:

- Dvije su riječi Milostivom drage, na jeziku lahke, na vagi teške: 'Slavljen neka je Allah, i hvaljen i Slavljen neka je Allah Uzvišeni.'

*Subhanallahi ve bi hamdihi, Subhanalla hil azim.*

5. Prenosi se da je hazreti Hammam bin Munebbih r.a. rekao kako mu je kazivao hazreti Ebu- Hurejre r.a., a prenio je od Allahovog Poslanika s.a.v.s. da Uzvišeni Allah kaže:

"Moj rob je slagao o Meni, a to njemu nije dolikovalo; opsovao Me je, a on na to nije imao pravo. Njegovo odbijanje Mene kad kaže da Ja nisam moćan da njega opet stvorim kad Sam ga jednom stvorio. Što se tiče njegove psovke, to je kad on kaže kako je Allah uzeo sina - a Ja sam Neovisan, nisam rodio, nisam rođen i niko Mi ravan nije."

6. Hazreti Džabir r.a. kazao je kako je čuo da Allahov Poslanik s.a.v.s. kaže:  
"Najbolji zikir je *La ilahe illallah* (Nema drugog boga osim Allaha.), a najbolja je dova *Elhamdulillah* (Hvala Allahu.)".

7. Hazreti Ebu-Musa El-Eš'ari r.a. prenosi da je Vjerovjesnik s.a.v.s. rekao:  
- primjer onog ko spominje svoga Gospodara i onog ko Ga ne spominje je kao primjer živog i mrtvog čovjeka.

Hadis prenosi iz Muslim (zbirke hadisa) da je Vjerovjesnik s.a.v.s. rekao:

"Kuća u kojoj se Allah spominje i kuća u kojoj se Allah ne spominje jesu kao živ i mrtav."

8. Hazreti Ebu-Musa r.a. kaže:

- Bili smo s Vjerovjesnikom s.a.v.s. na jednom putovanju. Ljudi su počeli uzvikivati tekbir: *Allahu ekber* (Allah je najveći), a Vjerovjesnik reče:

"Ljudi! Obuzdajte se, ne dozivate ni gluhog niti nekog koga nema; vi dozivate Onog što sve čuje i koji je blizu, i On je s vama."

9. Hazreti Ebu-Hurejre r.a. prenosi od Vjerovjesnika s.a.v.s. sljedeće:

"Neki uzvišeni Allahovi meleki koji se kreću traže mjesta gdje se čini zikir i kad nađu skup gdje se čini zikir, sjede s tim ljudima. Jedan drugog pokrivaju krilima sve dok na taj način ne ispune prostor između Zemlje i dunjalučkog neba. (Ovo je jedna metafora koja predstavlja beskrajnu Božiju milost. Nemojte je uzimati u stvarnom obliku. Op. prev.) Kad se ljudi razidu, meleki se uzdignu na nebo, a Svevišnji Allah upita ih, znajući najbolje gdje su bili:

- Odakle ste došli?

- Došli smo od Tvojih robova na Zemlji – kažu oni – oni Te veličaju, slave, ime Ti uznose, hvale Te i traže od Tebe.

- A šta Mi to traže? – upita On, a oni na to kažu:

- Traže Tvoj Džennet.

- Jesu li vidjeli Moj Džennet?

- Nisu, Gospodaru.

- Kako bi bilo da su vidjeli Moj Džennet? – Upita Allah, a oni odgovoriše:

- Tražili bi Tvoju zaštitu.

- A od čega bi je tražili?

- Od Tvoje Vatre, Gospodaru.

- A jesu li vidjeli Moju Vatru?

- Nisu, Gospodaru.

- Šta bi bilo da su vidjeli Moju Vatru?

Oni kažu:- Tražili bi da im oprostiš grijehе.

A On kaže:

- Već sam im oprostio, dao sam im šta su tražili, zaštitio sam ih od onog od čega su tražili zaštitu.

Meleki tada kažu:

- Gospodaru, među njima ima taj i taj, grješni rob. Prolazio je, pa je sjeo s njima.

- I njemu sam oprostio – kazat će On, oni su skupina s kojom neće biti nesretan onaj što s njima sjedi.

## Ljubav Gospodara

10. Hazreti Ebu-Derda' r.a. kaže kako je Allahov Poslanik s.a.v.s. rekao:

- Jedna od dova Davuda a.s. bila je: “O moj Gospodaru, tražim od Tebe da Te volim, i ljubav onog ko Tebe voli i posao koji će me na ljubav prema Tebi navraćati. Gospodaru moj, ljubav prema Tebi učini jačom od mene i mog života, i moje čeljadi, i od vode hladne. “

11. Hazreti Enes r.a. prenosi od Vjerovjesnika s.a.v.s. da je rekao:

- Kod koga budu tri stvari, pomoću njih pronaći će slast imana: da mu Allah i Njegov Poslanik budu draži od svega drugog, da čovjeka voli samo radi Allaha, te da se mrzi vratiti nevjerovanju nakon što ga Allah izbavi iz njega, isto kao što mrzi da bude bačen u vatru.

(Buhari)

12. Od Hazreti Ebu-Hurejre r.a. prenosi se da je Allahov Poslanik s.a.v.s. rekao:

- Kad bi vjernik znao kolika je Allahova kazna, nijedan se ne bi nadao Džennetu; a da nevjernik zna kolika je Allahova milost, nijedan ne bi izgubio nadu u Džennet.

(Muslim)

13. Hazreti Vasile ibn El-Eska' r.a. prenosi od Vjerovjesnika s.a.v.s.:

- Uzvišeni Allah kaže: “Ja postupam prema Svojim robovima prema onom šta oni misle o Meni, neka oni misle šta god hoće.”

(Buhari, Darimi)

14. Prenosi hazreti Ebu-Hurejre r.a. da je Allahov Poslanik s.a.v.s. rekao:

- Uzvišeni Allah kaže: “Ja postupam prema Svom robu onako kako on misli o Meni. Ja sam s njim kad Me spominje. Tako Mi Allaha, On se toliko raduje *teubi* Svoga roba, više nego iko od vas kad nađe kamilu koju je u pustinji izgubio. Allah kaže: 'Ko se Meni primakne pedalj, Ja se njemu primaknem lakat; ko se Meni približava lakat, Ja mu se primaknem cijeli hvat. Kad Meni korača, Ja njemu trčim.’”

(Muslim)

15. Hazreti Ebu-Hurejre r.a. kaže da je Allahov Poslanik s.a.v.s. rekao:

- Neki čovjek je činio grijeh prema sebi, a kad mu se približila smrt, ostavio je oporuku svojoj djeci govoreći:

"Kad umrem, spalite me i u pepeo me pretvorite, pa me bacite u vjetar u more. Tako mi Allaha, ako me moj Gospodar uhvati, kaznit će me sigurno kao što nikog nije kaznio."

Allahov Vjerovjesnik s.a.v.s. je rekao: "Njegovi sinovi su uradili kako je bilo rečeno, a Allah je naredio zemlji:

- Izbaci ono što si uzela.

Potom je on ustao pa je bio upitan:

- Šta te je navelo da to učiniš?  
On je rekao:  
- Strah od Tebe, Gospodaru.  
Onda mu je On oprostio."  
(Buhari, Ibn-Madždže)

## Časni Kur'an

16. Od hazreti Osmana Ibn-Affana r.a. prenosi se da je Allahov Poslanik s.a.v.s. rekao:  
- Najbolji među vama jeste onaj ko nauči Kur'an, a potom druge poučava njemu.  
(Buhari)

17. Hazreti Ibn-Abbas r.a. prenosi da je Allahov Poslanik s.a.v.s. rekao:  
- Onaj koji ne zapamti ni jedan dio Kur'ana je kao porušena kuća.  
(Tirmizi)

18. Hazreti Zejd Ibn-Erkam r.a. prenosi:  
- Allahov Poslanik s.a.v.s. jedan dan je ustao da održi vaz. Zahvalio se Allahu, potom je vazio i upozoravao. Zatim rekao:  
- Ljudi! Ja sam čovjek, uskoro će stići izaslanik od moga Gospodara i ja ću napustiti ovaj svijet. Ostavljam vam dvije velike stvari: prva od njih je Allahova Knjiga, u tome su uputa i svjetlo; uzmite Allahovu Knjigu i čvrsto je se držite.  
Tako nas je potakao prema Allahovoj Knjizi.  
I onda je rekao:  
- I ostavljam svoju porodicu; ja vas upozoravam da se bojite Allaha kad postupate s mojom porodicom, bojte se Allaha kad postupate s mojom porodicom, sa strahom od Allaha postupajte s mojom porodicom.  
(Muslim)

## Uzor za život u Allahovom Vjerovjesniku

19. Hazreti Abdullah Ibn-Ebi Evfa r.a. kaže da Vjerovjesnik s.a.v.s. nije gledao s prezirom i nije odbijao da se druži sa hudovicom i siromahom. Ispunjavao je njihove potrebe.  
(Darimi)

20. Hazreti Aiša r.a. kaže kako Allahov Poslanik s.a.v.s. nikad rukom nikog nije udario, ni ženu ni slugu, osim kad se borio na Allahovom putu. Nikad se nije osvetio kad ga je neko vrijeđao, osim kad bi bila vrijeđana neka Allahova zabrana. Tad bi se osvetio radi Allaha.  
(Muslim)

21. Hazreti Ebu-Seid el-Hudri r.a. kaže kako je Allahov Poslanik s.a.v.s. napasao devu, obavljao kućne poslove, popravljao obuću i šio odjeću; muzao je ovcu, jeo je sa slugom i mlio je s njim žito kad bi se ovaj umorio. Nije se stidio nositi kući potrepštine s pijace. Jednako bi se rukovao i sa bogatašem i sa siromahom, prvi je nazivao selam, nije odbijao ništa što mu se ponudi, pa makar to bila i suha hurma. Olakšao bi onima koji su teško radili; bio je blage naravi, plemenit, lijepo se ophodio s ljudima, bio je vedrog lica, nasmijan, a nije se glasno smijao; bio je zabrinut radi straha od Boga, a nije se ljutio; bio je ponizan, ali ne zbog neke slabosti; bio je milosrdan, ali bez razbacivanja, mehkog srca, milostiv prema svakom muslimanu. Nikad nije jeo do sitosti da podriguje, niti je pružao ruku iz pohlepe.

(Risala Kušejrijja)

22. Hazreti Ebu-Musa el-Eš'ari r.a. prenosi kako je hazreti Aiša r.a. pokazala jedan gornji i jedan donji ogrtač od grubog materijala i rekla:

- Allahov Poslanik s.a.v.s. je umro odjeven u ova dva komada odjeće.

(Buhari)

## Temelji islama

23. Hazreti Ibn-Omer r.a. kaže kako je Allahov Poslanik s.a.v.s. rekao:

- Temelji islama leže na pet stvari: svjedočanstvu da nema drugog boga osim Allaha i da je Muhammed Allahov poslanik, na obavljanju namaza, davanju zekata, odlasku na hadždž i postu ramazana.

(Buhari)

24. Hazreti Omer Ibn el-Hattab r.a. prenosi:

- Bili smo kod Allahovog Poslanika s.a.v.s. kad dođe neki čovjek u veoma bijeloj odjeći i jako crne kose. Na njemu se nije vidio trag putovanja, a niko ga od nas nije poznavao. Došao je do Poslanika s.a.v.s. i prislonio svoje koljeno uz njegovo i upitao:

- Muhammede, šta je *Iman*?

On reče:

- Da vjeruješ u Allaha, u Njegove meleke, u Njegove knjige, u Njegove poslanike, u Sudnji dan i u određenje, i u dobro i u loše.

(Tirmizi)

25. Prenosi se od hazreti Osmana Ibn-Affana r.a. da je jedanput tražio posudu s vodom. Prvo je njome tri puta oprao ruke, zatim desnom rukom zahvatio vodu iz posude i isprao usta i nos, potom je tri puta oprao lice i ruke do lakata. Onda je mokrom rukom potrao po glavi, pa je tri puta oprao noge do članaka. Onda je rekao kako je Allahov Poslanik s.a.v.s. rekao:

- Ko uzme abdest kao što sam ja sada i potom klanja dva rekata da ne misli ni na šta drugo, bit će mu oprošteni raniji grijesi.

(Buhari)

26. Hazreti Ebu-Hurejre r.a. prenosi da je Allahov Poslanik s.a.v.s. rekao:

- Hoćete li da vam kažem ono čime Allah briše grijehe i podiže deredže?

- Naravno, Allahov Poslaniče – kazali su. On reče:

- Propisno uzeti abdest čak i nerado, ići do džamije iz daleka i nakon obavljanja jednog iščekivati drugi namaz. Ovo su sredstva da budete spremni da čuvate granice.\*

\*Riječ 'ribat' obuhvata širok krug značenja. Ona doslovno znači geografske granice, a metaforički se primjenjuje za bilo koju duhovnu vrijednost. U ovom slučaju ona je primijenjena za instituciju obožavanja u islamu.

(Muslim)

27. Hazreti Aiša r.a. prenosi:

- Allahov Poslanik s.a.v.s. namaz je počinjao s tekbirom i učenjem Fatihe. Kad bi bio na ruku'u, ne bi ispravljao glavu niti bi je zabacivao, već između toga. Kad bi podigao glavu s ruku'a, ne bi išao na sedždu dok se ne bi potpuno ispravio, a kad bi dizao glavu sa sedžde, ne bi ponovo išao na sedždu dok ne bi mirno sjeo. Na svaka dva rekata učio je jedno *Et-Tehijjatu*. Podavio bi ispruženo stopalo lijeve noge, a desno ne bi podavijao. Zabranjivao je da se sjedi kao šejtan (sa nepodavijena oba stopala) i zabranjivao je da se laktovi polože kao što psi čine. Namaz je završavao selamom.

(Ahmed)

28. Hazreti Abdullah Ibn-Mes'ud r.a. kaže:

- Pitao sam Allahovog Poslanika s.a.v.s. koja su djela Uzvišenom Allahu najdraža, a on mi je rekao:

- Namaz na vrijeme.

Pitao sam: - Koja djela poslije toga?

I on je rekao: - Dobročinstvo prema roditeljima.

Onda sam pitao: - Koja nakon toga?

On je rekao: - Džihad (borba) na Allahovom putu.

(Buhari)

29. Hazreti Amr Ibn-Šuajb r.a. prenosi od svog oca, a on od djeda da je Allahov Poslanik s.a.v.s. rekao:

- Naređujte djeci da klanjaju kad napune sedam godina, a kad napune deset godina udarajte ih zbog namaza i razdvajajte u postelji.

(Ebu-Davud)

30. Hazreti Fatima Zehra r.a. kaže:

- Kad bi Allahov Poslanik s.a.v.s. ulazio u džamiju, učio je: "U ime Allaha, selam Allahovom Poslaniku. Bože moj, grijehe mi oprost i otvori mi vrata Svoje milosti." A kad bi izlazio, govorio bi: "U ime Allaha, selam Allahovom Poslaniku. Bože moj, grijehe mi oprost i otvori mi vrata Svoje dobrote."

(Ahmed)

## Post

31. Hazreti Ebu-Hurejre r.a. prenosi kako je Allahov Poslanik s.a.v.s. kazao da je Allah rekao:

- Sav posao čovjekov je za njega, osim posta, on je radi Mene i Ja ću biti nagrada za to, i post je štit. Kad neko od vas bude postio, neka ne govori ružno i neka ne diže glas. Ako se neko svađa s njim, neka kaže: "Ja postim!". Tako mi Onog u čijoj je ruci Muhammedova duša, zadah iz postačevih usta draži je Allahu od mirisa miska. Postač ima dvije radosti: kad se iftari, radostan je, a kad sretne svog Gospodara, bit će radostan zbog svog posta.

(Buhari)

32. Hazreti Ebu-Hurejre r.a. kaže da je Vjerovjesnik s.a.v.s. rekao:

- Ko ne napusti laž i postupanje po tome, Allahu nije potrebno njegovo odricanje od jela i pića.

(Buhari)

33. Hazreti Aiša r.a. prenosi da je Vjerovjesnik s.a.v.s. sjedio u i'tikafu zadnjih deset dana ramazana sve dok ga Uzvišeni Allah nije uzeo Sebi, a poslije toga su u i'tikafu sjedile njegove žene.

(Buhari)

## Hadž

34. Hazreti Ebu-Hurejre r.a. kaže:

- Allahov Poslanik s.a.v.s. držao je hutbu, pa je kazao:

- Ljudi, Allah vam je naredio hadž, obavite hadž.

Neki čovjek upita:

- Je li svake godine, Allahov Poslaniče?

On je šutio dok ovaj tripud nije ponovio. Onda Poslanik reče:

- Da sam rekao *da*, bilo bi obavezno, a ne biste to mogli.

Zatim je rekao:

- Prepustite meni ono što sam izostavio, oni prije vas su bili uništeni zbog mnogo pitanja i zbog neslaganja sa svojim vjerovjesnicima. Kad vam nešto naredim, činite to koliko možete; a kad vam nešto zabranim, ostavite to.

(Muslim)

35. Hazreti Ebu-Hurejre r.a. prenosi da je Allahov Poslanik s.a.v.s. rekao:

- Ko obavi hadž radi Allaha i ne govori ružno i ne griješi, vratit će se kao na dan kad ga je majka rodila.

## Zekat (Trošenje na Allahovom putu)

36. Hazreti Muaz r.a. kaže kako ga je Allahov Poslanik s.a.v.s. poslao kao izaslanika, rekavši:

- Ti ideš narodu sljedbenika Knjige, pozovi ih da posvjedoče da nema drugog boga osim Allaha i da sam ja Allahov poslanik. Ako se pokore, nauči ih da im je Allah naredio pet namaza svakog dana i noći. Ako se tome pokore, nauči ih da im je Allah naredio sadaku, koja će se uzimati od njihovih bogatih i davati njihovim siromašnim. Ako se tome pokore, onda se kloni njihovog najboljeg imetka. Dobro se čuvaj kletve onog kome je učinjena nepravda, jer između nje i Allaha nema zastora.

(Buhari)

37. Hazreti Hurejm Ibn-Fatik r.a. prenosi da je Allahov Poslanik s.a.v.s. rekao:

- Ko udijeli na Allahovom putu, bit će mu upisano sedam stotina puta toliko sevapa.

(Tirmizi)

38. Hazreti Enes r.a. prenosi da je hazreti Ebu-Talha r.a. imao najviše hurmi među Ensarijama u Medini, a najdraža mu je od sveg imetka bila bašča s bunarom *Ha'*, koji se nalazio naspram džamije. Allahov Poslanik bi dolazio i pio njegovu dobru vodu. Onda je objavljen ajet: *“Nećete postići dobrotu dok ne budete trošili i od onog što volite.”* Ebu-Talha je došao kod Allahovog Poslanika s riječima:

- Allahov poslaniče, Allah ti je objavio: *“Nećete postići dobrotu dok ne budete trošili od onog što volite”*. Meni je najdraža u mom imetku bašča s bunarom *Ha'*, on je sadaka Allahu Uzvišenom. Od Allaha se nadam njegovom dobru i zalih. Daj ga, Allahov Poslaniče, gdje ti Allah pokaže.

Poslanik reče:

- Aferim! To je plodonosan imetak, to je plodonosan imetak. Čuo sam šta si rekao, ali mislim da ga trebaš dati svojim bližnjim.

- Učinit ću tako – reče Ebu-Talha. Podijelio ga je među svojom rodbinom i amidžićima.

(Buhari)

39. Hazreti Addi Ibn-Hatim r.a. priča da je Allahov Poslanik rekao:

- Čuvajte se vatre, pa makar udjeljivanjem komadića hurme.

(Buhari)

40. Hazreti Aiša r.a. kaže da je Allahov Poslanik s.a.v.s. rekao:

- Darežljiv čovjek blizak je Uzvišenom Allahu, blizak je ljudima, blizak je Džennetu, a dalek je od Vatre. Škrt čovjek dalek je od Uzvišenog Allaha, dalek je od ljudi, dalek je od Dženneta, a blizak je Vatri. Darežljiv džahil draži je Allahu od škrtog klanjača.

41. Hazreti Ebu-Hurejre r.a. prenosi kako je neki čovjek upitao:  
- Allahov Poslaniče, za koju je sadaku najveća nagrada? Poslanik je rekao:  
- Da dijeliš sadaku a da si zdrav, da se bojiš siromaštva a nadaš se bogatstvu. I nemoj odgađati (to znači da ne zakasniš da daješ sadaku) sve dok ti duša ne dođe u grlo; i onda ti kažeš: "Ovo pripada tom i tom; i ovo sigurno nekom pripada."

## **Naređivanje dobra i zabranjivanje zla**

42. Hazreti Huzejfe r.a. prenosi da je Vjerovjesnik s.a.v.s. rekao:  
- Tako mi Onog u čijoj je ruci moja duša, ili ćete naređivati dobro a odvrćati od zla, ili će vam Allah poslati kaznu od Sebe. Onda ćete Mu činiti dove, ali one neće biti primljene.  
(Tirmizi)

43. Od hazreti Nu'mana Ibn-Bešira r.a. prenosi se da je Vjerovjesnik s.a.v.s. rekao:  
- Primjer onog ko se drži Allahovih granica i onog koji ih prelazi je kao primjer ljudi koji su bacili kocku da dobiju mjesto na lađi, pa je neke zapao gornji a neke donji dio. Oni što ih je zapao donji dio, kad bi tražili vodu, prolazili bi pored onih iznad i govorili: 'Kad bismo mogli probušiti rupu u našem dijelu, da ne smetamo ovima iznad nas.'  
Ako oni na gornjem dijelu dopuste ovima da urade što su htjeli, svi će otići u propast, a ako ih spriječe, svi će ostati spašeni.  
(Buhari)

## **Pozivanje ljudi Allahu**

44. Od hazreti Sehla Ibn-Seida r.a. prenosi se da je Vjerovjesnik s.a.v.s. rekao hazreti Aliji r.a.:  
- Tako mi Boga, ako Allah uputi jednog čovjeka preko tebe, to je bolje od najbolje crvene kamile.  
(Muslim)

45. Hazreti Ebu-Hurejre r.a. prenosi da je Allahov Poslanik s.a.v.s. rekao:  
- Ko bude pozivao na Uputu, imat će nagradu kao oni što će ga slijediti, s tim da njihove nagrade neće biti umanjene; a ko bude pozivao u zabludu, imat će grijeh isti kao i oni što će ga slijediti, s tim da njihovi grijesi nimalo neće biti umanjeni.  
(Muslim)

46. Hazreti Enes r.a. kaže da je Vjerovjesnik s.a.v.s. rekao:  
- Olakšavajte, ne otežavajte. Razveseljavajte, ne rastužujte.  
(Muslim)

## Halal i haram

47. Od hazreti Ebu-Sa'lebea el-Hušenija Džursuma Ibn-Našira r.a. prenosi se da je Allahov Poslanik s.a.v.s. rekao:

- Uzvišeni Allah je naredio neke obaveze, nemojte te obaveze zabacivati. Postavio je granice, nemojte ih prelaziti. Zabranio je određene stvari, nemojte te zabrane kršiti. Neke je stvari prešutio iz milosti prema vama, nije ih zaboravio. O tim stvarima nemojte ispitivati.

(Darekutni)

48. Hazreti Nu'man Ibn-Bešir r.a. kaže:

- Čuo sam Allahovog Poslanika s.a.v.s. kad je rekao:

"Halal je jasno određen i haram je jasno određen. Između njih su sumnjive stvari, koje veliki broj ljudi ne poznaje. Ko se tih sumnjivih stvari sačuva, sačuvat će svoju vjeru i čast; a ko padne u sumnjive stvari, past će u haram, kao čoban koji čuva stoku u blizini zabranjenog posjeda, pa stoka možda uđe u njega. Slušajte! Svaki vladar ima zabranjeni posjed, a Allahov zabranjeni posjed su Njegove zabrane. Slušajte! U tijelu je jedan organ i ako je taj organ ispravan, ispravno je cijelo tijelo, a ako se pokvari, pokvarit će se cijelo tijelo. Taj organ je srce."

(Muslim)

## Brak

49. Hazreti Ebu-Hurejre r.a. prenosi da je Vjerovjesnik s.a.v.s. rekao:

- Sa ženom se možete oženiti zbog četiri stvari: zbog njenog imetka, zbog njene porodice, zbog njene ljepote i zbog njene vjere. Ali ti dadni prednost vjeri, inače si propao.

(Buhari)

50. Od hazreti Ebu-Hurejre r.a. prenosi se da je Vjerovjesnik s.a.v.s. kazao:

- Najgori je svadbeni poziv na jelo na koje se pozivaju bogati, a ne pozivaju siromašni. A ko se ne odazove na poziv, on je neposlušan Allahu i Njegovom Poslaniku.

(Muslim)

51. Hazreti Ibn-Omer r.a. kaže kako je Vjerovjesnik s.a.v.s. rekao:

- Allahu je najmrža dozvoljena stvar razvod (po potrebi je dozvoljeno, ali Bog ovo jako mrzi).

(Ebu-Davud)

52. Hazreti Aiša r.a. kaže da je Allahov Poslanik s.a.v.s. rekao:

- Najbolji među vama je onaj ko je najbolji prema svojim ukućanima. Ja sam najbolji prema svojim ukućanima.

(Ebu-Davud)

## Lijepo ponašanje

53. Od hazreti Džabira r.a. se prenosi da je Allahov Poslanik s.a.v.s. rekao:

- Meni će od vas na Sudnjem danu biti najdraži i najbliži onaj ko bude imao najljepši ahlak, a najmrži su mi i na Sudnjem danu bit će najdalje od mene brbljivci, hvalisavci i mutefejkiji.

- Allahov Poslaniče, – rekoše ljudi, znali smo za brbljivce i hvalisavce, ali ko su mutefejkiji?

- Oholi – reče on.

(Tirmizi)

54. Hazreti Ebu-Hurejre r.a. prenosi da je Allahov Poslanik s.a.v.s. rekao:

- Ja sam poslan da upotpunim plemeniti ahlak.

55. Hazreti Ebu-Hurejre r.a. prenosi da je Poslanik s.a.v.s. rekao:

- Ko vjerniku otkloni jednu od dunjalučkih briga, Allah će otkloniti jednu od njegovih briga Sudnjeg dana. Ko olakša nekom kome je teško, Allah će njemu olakšati na dunjaluku i na Ahiretu. Ko prikrije muslimana, Allah će njega prikriti na dunjaluku i na Ahiretu. Allah će pomagati Svom robu sve dok on pomaže svom bratu, a ko krene putem, tražeći na njemu znanje, Allah će mu put u Džennet učiniti lakim. Nikad se neka grupa ljudi nije sastala u jednoj od Allahovih kuća učeći Kur'an i proučavajući ga a da im nije spuštена sigurnost, da ih nije obuhvatila milost, da ih meleki nisu okružili i da ih Allah nije spomenuo onima bliskim Njemu. A koga njegovo djelo uspori, neće ga ubrzati njegovo porijeklo (znači on neće ući u Džennet zbog svog imena i porodice itd.).

(Muslim)

56. Hazreti Ebu-Hurejre r.a. prenosi da je Allahov Poslanik s.a.v.s. rekao:

- Uzvišeni će Allah na Sudnjem danu reći:

"O sine Ademov, bio sam bolestan, a ti Me nisi obišao."

"Gospodaru, – reći će čovjek – kako ću Te obići, Ti si Gospodar svjetova?!"

On će reći:

"Zar nisi poznao tog i tog Mog roba, on se razbolio, a ti ga nisi obišao, iako si znao da ćeš Me kod njega naći ako ga obiđeš.

Sine Ademov, tražio sam da Me nahraniš, a ti Me nisi nahranio."

"Gospodaru, kako ću Te nahraniti, ti si Gospodar svjetova?!" – reći će on, a Allah će kazati:

"Zar se ne sjećaš kad ti je taj i taj Moj rob tražio da ga nahraniš, a ti ga nisi nahranio, iako si znao da ćeš to naći kod Mene ako ga nahraniš.

Sine Ademov, tražio sam da Me napojiš, a ti Me nisi napojio."

On će reći:

"Gospodaru, kako ću Te napojiti, pa Ti si Gospodar svjetova!?"

"Tražio ti je taj i taj Moj rob da ga napojiš, a ti ga nisi napojio; a da jesi, našao bi to kod Mene" – reći će Allah.  
(Muslim)

57. Vjerovjesnik s.a.v.s. kaže:

- Nećete obogatiti ljude svojim imetkom, obogatite ih vedrim licem i lijepim ponašanjem.  
(Risala Kušejrijja)

## **Islamsko društvo**

58. Hazreti Enes r.a. kaže kako je Vjerovjesnik s.a.v.s. rekao:

- Niko od vas neće biti vjernik dok svom bratu ne bude želio što želi samom sebi.  
(Buhari)

59. Od hazreti Ebu-Hurejre r.a. prenosi se da je Allahov Poslanik s.a.v.s. rekao:

- Ebu-Hurejre! Budi suzdržljiv, pa ćeš biti najbolji rob među ljudima, budi zadovoljan, pa ćeš biti najzahvalniji među ljudima, želi ljudima što i sebi želiš, pa ćeš biti vjernik, lijepo postupaj s komšijom do tebe, pa ćeš biti musliman i umanji glasno smijanje, jer ono usmrćuje srce.

(Ibn-Madždže)

60. Hazreti Ebu-Jusuf Abdullah ibn Selam r.a. kaže kako je čuo Allahovog Poslanika s.a.v.s. kad je rekao:

- Ljudi! Širite selam (mir), hranite hranom, uspostavljajte prisne veze i klanjajte dok ljudi spavaju, ako tako budete radili, onda ćete sigurno ući u Džennet.

(Tirmizi)

61. Od hazreti Ebu-Mes'uda r.a. prenosi se da je Allahov Poslanik s.a.v.s. rekao:

- Kad vas je trojica, neka se dvojica ne sašaptavaju bez trećeg dok se ne pomiješate s ljudima, jer će ga to rastužiti.

(Muslim)

62. Hazreti Ebu-Hurejre r.a. kaže da je Allahov Poslanik s.a.v.s., kad bi kihao, stavljao ruku ili odjeću na usta kako bi na taj način prigušio zvuk kihanja.

(Tirmizi)

## **Biti zahvalan ljudima**

63. Hazreti Ebu-Hurejre r.a. prenosi da je Allahov Poslanik s.a.v.s. rekao:

- Ko nije zahvalan ljudima, neće biti zahvalan ni Allahu.

(Tirmizi)

## **Lijepo postupanje prema roditeljima**

64. Hazreti Ebu-Hurejre r.a. prenosi kako je neki čovjek došao kod Allahovog Poslanika s.a.v.s. i upitao:

- Allahov Poslaniče, ko od ljudi ima najviše prava da se prema njemu lijepo ophodim?

- Tvoja majka – odgovorio je Poslanik. On upita:

- Ko onda?

-Tvoja majka.

-Ko onda?

-Tvoja majka.

- A ko onda?

- Tvoj otac – reče Poslanik.

U jednoj predaji stoji ovako:

- Allahov Poslaniče, ko ima najviše prava da se prema njemu lijepo ophodi?

On je odgovorio:

- Tvoja majka, potom tvoja majka, potom tvoja majka, pa tvoj otac, pa najbliži, pa najbliži.

(Buhari)

65. Prenosi se od hazreti Ebu-Hurejre r.a. da je Vjerovjesnik s.a.v.s. rekao:

- Sram bilo, sram bilo, sram bilo onog ko je dočekao da roditelji ostare kod njega, jedno ili oboje, a nije ušao u Džennet.

(Muslim)

## **Lijepo postupanje prema susjedima**

66. Hazreti Ibn-Omer r.a. i hazreti Aiša r.a. kažu da je Allahov Poslanik s.a.v.s. rekao:

- Džibril me je neprestano savjetovao o postupku prema komšiji, toliko da sam pomislio da će ga učiniti nasljednikom.

(Buhari)

67. Hazreti Ebu-Hurejre r.a. prenosi da je Allahov Poslanik s.a.v.s. rekao:

- Ko vjeruje u Allaha i Sudnji dan, neka ne čini štetu komšiji; ko vjeruje u Allaha i Sudnji dan, neka lijepo ugosti gosta; ko vjeruje u Allaha i Sudnji dan, neka govori lijepo ili neka šuti.  
(Buhari)

68. Hazreti Ebu-Hurejre r.a. prenosi da je Allahov Poslanik s.a.v.s. rekao:  
- Tako mi Allaha, on nije vjernik! Tako mi Allaha, on nije vjernik! Tako mi Allaha, on nije vjernik!  
- Ko nije vjernik, Allahov Poslaniče? – bio je upitan, pa je kazao:  
- Onaj od čijeg zla nije siguran njegov komšija.  
(Buhari)

## **Ljubaznost prema slabima**

69. Od hazreti Ebu-Hurejre r.a. prenosi se da je Allahov Poslanik s.a.v.s. rekao:  
- Koliko je prljavih i otrcanih (znači onih koji izgledaju obični), koje odbijaju s vrata. A kad bi oni kleli Allahu, onda bi Bog tako učinio.  
(Muslim)

70. Hazreti Ebu-Derda' r.a. kaže da je čuo Allahovog Poslanika s.a.v.s. kako govori:  
- Tražite mene u slabima među vama, a nafaka i pomoć dolazi vam zahvaljujući slabima među vama.  
(Tirmizi)

## **Oprost**

71. Hazreti Muaz Ibn-Enes r.a. prenosi od Allahovog Poslanika s.a.v.s. sljedeće:  
- Najbolja dobrota je da se vezuješ za onog ko je prekinuo vezu s tobom, da dadneš onom ko je tebi zabranio i da oprostiš onom ko ti je opsovao.  
(Ahmed)

72. Hazreti Ebu-Hurejre r.a. kaže da je Allahov Poslanik s.a.v.s. rekao:  
- Sadaka neće umanjiti imetak, a čovjeku koji drugima oprosti kad mu bude učinjena nepravda, Bog podari još veće poštovanje i čovjek se ne osramoti ako nekom oprosti.  
(Ahmed)

## Ponašanje za jelom

73. Hazreti Aiša r.a. prenosi da je Allahov Poslanik s.a.v.s. rekao:  
- Kad neko od vas bude jeo, neka spomene Allahovo ime; a ako zaboravi spomenuti Allahovo ime na početku, neka kaže: "U ime Allaha na početku i na kraju".  
(Tirmizi)

74. Hazreti Ebu-Seid r.a. kaže da je Allahov Poslanik s.a.v.s., kad je jeo ili pio, govorio:  
"Hvala Allahu, koji nas je nahranio, napojio i muslimanima nas učinio."  
(Tirmizi)

## Odjeća

75. Hazreti Huzejfe r.a. prenosi:  
Vjerovjesnik nam je zabranio svilu i brokat, i piće iz zlatnih i srebrenih posuda, rekavši:  
- Oni su njihovi na dunjaluku, a vaši su na Ahiretu.  
(Muslim)

76. Hazreti Ebu-Seid el-Hudri r.a. kaže:  
- Kad bi Allahov Poslanik s.a.v.s. nosio novu odjeću, nazivao bi to njenim imenom: turbanom, košuljom ili ogrtačem, i govorio:  
"Bože moj, Tebi hvala, Ti si me ovim obukao. Molim te da bude dobro i da bude dobro ono za šta je napravljeno, a utječem ti se od njegovog zla i od zla onog za šta je napravljeno."  
(Tirmizi)

## Čistoća

77. Hazreti Ebu-Malik el-Eš'ari r.a. prenosi da je Allahov Poslanik s.a.v.s. rekao:  
- Čistoća je uvjet vjerovanja.  
(Muslim)

78. Od hazreti Aiše r.a. prenosi se da je Vjerovjesnik s.a.v.s. rekao:  
- Misvak je sredstvo za čišćenje usta i postizanje Gospodarevog zadovoljstva.  
(Nesa'i)

## Ljubomora

79. Hazreti Ibn-Omer r.a. prenosi da je Allahov Poslanik s.a.v.s. rekao:

- Nemojte jedni drugima zavidjeti, nemojte jedni druge mamiti na prevaru dižući cijenu robi koja se ne želi kupiti, nemojte jedan drugog mrziti, nemojte jedni drugima leđa okretati i nemojte jedni preko drugih prodavati, već budite Allahovi robovi kao braća. Musliman je muslimanu brat, neće mu učiniti nepravdu, neće ga omalovažavati i ponižavati. Ovdje je bogobožnost! - i tri puta je pokazao na svoja prsa. Čovjeku je dovoljno zla da omalovaži svog brata muslimana. Svakom su muslimanu zabranjeni krv, imetak i čast drugog muslimana.

(Muslim)

80. Hazreti Ebu-Hurejre r.a. prenosi da je Vjerovjesnik s.a.v.s. rekao:

- Dobro se čuvajte zavisti, jer zavist guta dobra djela kao što vatra guta drva – ili je rekao suhu travu.

(Ebu Davud)

## Oholost

81. Od hazreti Abdullaha Ibn-Mes'uda r.a. prenosi se da je Vjerovjesnik s.a.v.s. rekao:

- Neće ući u Džennet onaj u čijem srcu bude trun oholosti.

Onda je neki čovjek rekao:

- Čovjek voli da mu je odjeća i obuća lijepa.

On je rekao: "Allah je lijep i voli ljepotu, a kibur je odbijanje istine i ponižavanje ljudi."

(Muslim)

82. Hazreti Abdullah r.a. prenosi kako je Allahov Poslanik s.a.v.s. rekao:

- Dobro čuvajte iskrenost, jer iskrenost vodi dobročinstvu, a dobročinstvo vodi u Džennet. Čovjek stalno govori istinu i drži se istine i onda kod Allaha bude upisan kao *iskreni*. A dobro se čuvajte laži, jer laž vodi u razvrat, a razvrat vodi u Vatru. Onaj ko stalno laže i drži se laži onda kod Allaha bude upisan kao *lažljivac*.

(Muslim)

83. Hazreti Ebu-Bekir r.a. kaže da je Allahov Poslanik s.a.v.s. upitao:

- Hoćete li da vam kažem koji su grijesi najveći?

- Naravno, Allahov Poslaniče – odgovorili smo, a on je kazao:

- Pripisivanje druga Allahu i neposlušnost roditeljima. Bio je naslonjen pa je sjeo, a onda reče:

- I neistinit govor!

Toliko je to ponavljao da smo rekli:

- Da je bogd'o šutio.

(Buhari)

## Opadanje islama

84. Hazreti Abdullah Ibn-Omer r.a. prenosi da je Allahov Poslanik s.a.v.s. rekao:

- Moj će ummet zadesiti isto ono što je zadesilo sinove Israilove, potpuno isto, kao što je jedna cipela nalik drugoj. Čak i ako među njima bude onaj ko majci priđe javno, i u mom ummetu bit će onaj ko će to raditi. Sinovi Israilovi podijelili su se u sedamdeset i dvije grupe, a moj ummet podijelit će se u sedamdeset i tri. Svi će u Vatru osim jedne zajednice.

- Koja je to zajednica, Allahov Poslaniče? – upitali smo, a on je rekao:

- Oni koji slijede mene i moje drugove.

(Tirmizi)

85. Od hazreti Alije r.a. prenosi se da je Allahov Poslanik s.a.v.s. rekao:

- Uskoro će ljudima doći vrijeme kad će od islama ostati samo ime, a od Kur'ana samo pismo. Džamije će biti izgrađivane, ali će biti prazne što se tiče upute. Njihovi učenjaci će biti najgori ljudi pod nebeskim svodom, od njih će polaziti smutnja i njima će se vraćati.

(Beihaki)

## Dolazak Imama Mehdija

86. Hazreti Ebu-Hurejre r.a. prenosi:

- Sjedili smo kod Vjerovjesnika s.a.v.s. kad mu je objavljena sura *Džumu'a* pa, kad je proučio: “ *I drugima (je njega poslao) među njima koji im se još nisu priključili,*“ jedan čovjek upita:

- Ko su ti, Allahov Poslaniče?

Vjerovjesnik mu nije odgovorio dok nije pitao dva ili tri puta. Među nama je bio Selman Farsi (Perzijac), pa je Vjerovjesnik stavio ruku na njega i rekao:

- Čak kad *iman* bude kod Pleidas (naudaljenijih zvijezda, potpuno nestajući sa Zemlje), bit će neki ljudi od njegovog naroda (u drugoj verziji je spomenut 'jedan čovjek' umjesto 'neki ljudi') ko će ponovo vratiti vjeru Zemlji.

(Buhari, Muslim)

87. Hazreti Ebu-Hurejre r.a. prenosi da je Allahov Poslanik s.a.v.s. rekao:

- Tako mi Onog u čijoj je ruci moja duša, uskoro će se među vama pojaviti Sin Merjemin da presudi i pravdu uspostavi. On će slomiti krst, ubit će svinju i zaustaviti rat. On će podijeliti toliko imetka (duhovnog) da ga niko neće primati i jedna sedžda će biti bolja od dunjaluka i svega što je na njemu.

Potom je hazreti Ebu-Hurejre r.a. rekao:

- Čitajte ovaj ajet ako želite: samo će sljedbenici Knjige vjerovati u njega prije smrti, a na Sudnjem danu on će biti svjedok protiv njih.

(Buhari)

88. Vjerovjesnik s.a.v.s. kaže:

- Između mene i Isaa, sina Merjeminog, nema ni vjerovjesnika ni poslanika. On će biti halifa (nasljednik) u mom ummetu nakon mene; on će sigurno ubiti Dedždžala, slomit će krst, ukinut će porez i zaustavit će rat. Ko ga sretne, neka mu prenese: “Selam!”

(Taberani)

89. Od hazreti Enesa r.a. se prenosi da je Allahov Poslanik s.a.v.s. rekao:

- Ko od vas sretne Isaa, sina Merjeminog, neka mu prenese selam od mene.

90. Hazreti Sevban r.a. kaže da je Allahov Poslanik s.a.v.s. rekao:

- Kad ga nađete, dadnite mu zavjet odanosti (bai'at), makar morali stići do njega preko zaleđene planine, jer je on Allahov halifa Mehdi.

(Ibn-Madždže)

91. Hazreti Ebu-Hurejre r.a. kaže da je Allahov Poslanik s.a.v.s. rekao:

- Kakvo će biti vaše stanje kad vam dođe Isa, sin Merjemin, a vaš Imam od vas?

U drugom predanju stoji:

- On će biti vaš Imam od vas.

(Buhari)

92. Od hazreti Muhammeda Ibn-Alija r.a. prenosi se da je Vjerovjesnik s.a.v.s. rekao:

- Naš Mehdi će imati dva znaka, koji se nikada nisu prije pojavili (kao znak istinitosti za bilo koga drugog), otkad su stvoreni nebesa i Zemlja: Mjesec će se pomračiti u mjesecu ramazanu prve noći od noći kad se mjesec pomračuje, tj. 13. dana ramazana, a Sunce će se pomračiti srednjeg dana od dana kad se Sunce pomračuje, tj. 28. dana ramazana (oba pomračenja će se dogoditi u istom mjesecu ramazanu). To se nikada prije nije dogodilo otkad su stvoreni nebesa i Zemlja.

(Darekutni)

## **Hudba Hadžet-ul Veda (Oprosní hadž)**

93. Hazreti Sulejman Ibn-Amr ibn el-Ahvas r.a. kaže da mu je pričao njegov otac kako je bio prisutan na Oprosnom hadždžu s Allahovim Poslanikom, koji se zahvalio Allahu i pitao:

- Koji je dan najsvetiji, koji je dan najsvetiji, koji je dan najsvetiji?

- Dan hadža najvećeg, Allahov Poslaniče – kazali su ljudi.

On je nastavio:

- Vaši životi, imeci i čast sveti su vam kao što je svet ovaj vaš dan, i ovaj grad, i ovaj mjesec. Slušajte! Niko ne čini nepravdu osim svojoj duši. Zato neka otac ne čini nepravdu prema

svom djetetu i neka dijete ne čini nepravdu prema svome ocu. Musliman je brat muslimanu, muslimanu nije dozvoljeno ništa bratovo, osim ono što mu sam dozvoli. Sva je kamata iz džahilijjeta oprostena, vama pripadaju glavnice vaših imetaka, tako nećete nepravdu učiniti i neće biti nepravde prema vama. Osim kamate Abbasa Ibn el-Muttaliba, ona je u cijelosti oprostena. Prva krv iz vremena džahilijjeta koju opraštam je krv Harisa Ibn el-Muttaliba. Bio je dojenče u Beni-Lejs, a ubio ga je iz plemena Huzejl. Sa ženama postupajte dobro, one su vaše povjerenje. Nemate ništa protiv njih osim ako one učine očito bestidno djelo; a ako to učine, odvojite se od njih u postelji i udarite ih, ali ne jako. A ako vam budu pokorne, ne tražite neki način protiv njih. Vi, zaista, imate pravo kod svojih žena, kao što one imaju pravo kod vas. Vaše pravo kod njih je da one ne uređuju svoje kuće za ljude koje vi ne volite i da im ne dozvolite da ulaze u vašu kuću oni koje vi ne volite. Slušajte! Njihovo pravo kod vas je da s njima lijepo postupate kad je u pitanju njihovo oblačenje i hrana. (Tirmizi)